

JOANNIS CLERICI

P R Æ F A T I O

I N

NICOLAI SANSONIS

GEOGRAPHIAM SACRAM.



UM jam maxima ex parte typis expressum esset hoc volumen, me convenit Bibliopola, rogaturus num quâ ratione exornari, augerive hæc ejus editio posset. Me consideraturum dixi, sed interea, dum aliis gravioris momenti negotiis, ac studiis distineor, multi elapsi sunt menses; antequam manum calamo admoveere, ac perficere quæ animo conceperam quirem. Imò verò, frustra diu expectato majore otio, ne nunc quidem satis vacabat; ut præstare possem quod cuperem. Attamen ne diutius impedirem, ne opus luce dignum tandem erumperet, satius duxi id facere, quod sinebant angustiae temporis, in quibus versabar, quam etiamnum differre. Ut ante omnia de NICOLAO SANSONE aliquid dicam, quamvis in notis ad ejus *Indicem* sæpe diversus ab eo abierim, memoriam tamen viri, eruditionemque, atque indefessos labores in illustranda Geographia, cum descriptionibus, tum Tabulis æneis me vehementer probare, ac mirari profiteor, præsertim in iis quæ ad recentiorum Geographiam pertinent. Non dissimulavi optandum fuisse Viro Clarissimo Hebraicam, Græcamque Linguam æquè notas fuisse, ac reliquum Geographicæ disciplinæ artificium; nec sum nescius, etiam in recentioribus ejus Tabulis, nonnulla reprehendi; sed quis miretur, in tam multiplici regionum & nominum varietate, quempiam interdum vacillare ac labi? Nemo profectò qui paullo æquior sit, noritque nullum esse omnium delictorum prorsus immunem. Itaque maneat Doctissimo Viro integra atque illibata laus sua, & Geographicæ Studiosi, me probante ac plaudente, Tabulis ejus elegantissimis uti pergant, memoresque tantorum ejus laborum gratias homini habeant, quas ipse habeo & me libenter habere profiteor. Quæ dicenda existimavi, propter malignos quosdam homines, qui putant eum non posse reprehendi, quem ceteroquin in pretio habeas, & cui multum te debere agnoscas.

Nunc, oblata occasione, brevem indiculum texam eorum, qui, aut Judæam descriperunt, aut certè quidpiam ad Geographicæ Sacrae illustrationem labore atque industriâ suâ contulerunt. Si quem autem omiserò, nemo negligentia, aut invidia factum putet; sed quod aut mihi ignotus fuerit, quod satis à libris instructus non sim, nec sit ad manum copiosior Bibliotheca, quam adire possim; vel etiam quod memoria me fefellerit, nec ut plura colligerem tempus siverit. Si quis notus mihi esset, qui simile quidquam præstitisset, libenter & grato animo labore ejus uterer; nec intercedo, quominus alii libris instructiores, pinguiori otio abundantes, lectionisve majoris beneficio eruditiores, aut tenacioris memoriæ præditi, meliora & accuratiora in Reipublicæ Litterariæ usum proferant. Quin & adprobationem, plausumque à me ferent; non sum enim, Dei gratiâ, in eorum numero, qui quod præstare ipsi nequeunt, id à nemine fieri posse existimant, aut cupiunt. Ceterum sciant oportet quicumque in hæc incident, mihi animum non fuisse colligere omnium nomina, qui *Itineraria* olim, aut nuper, Terræ Sanctæ scripserunt; neque omnium Geographorum, qui in majoribus Operibus ejus, inter Asiæ regiones, paucis meminerunt. Longum hoc esset & inuti-